



Glion, ils 7 da october 2022

Communicaziun a las medias

Dis da litteratura 2022

## Program dils 31avelis Dis da litteratura

En exact quatter emnas èsi uschè lunsch: Dals 4 fin ils 6 da november 2022 han lieu ils 31avelis Dis da litteratura en la halla Tircal a Domat. Quest onn s'occupan els da la notg e porschan in program varià cun vernissaschas, prelecziuns, discussiuns e preschentaziuns dad ediziuns actualas. Sco motiv literar ni sco spazi creativ transfurma la notg la percepciun, sveglia emoziuns e inspirescha autur:as e lectur:as.

L'entschatta dals Dis da litteratura fa il venderdi saira ina prelecziun extraordinaria. El stgir datti ina prelecziun performativa da l'autur **Michael Fehr** da ses nov cudesch «Hotel der Zuversicht». Las glischs èn stizzadas, il focus è cumplettamain sin il text: Co mida quai nossa percepciun? Èn forse tut auters detagls en il center?

Lasuenter vegni puspè cler e **ladunna** sa metta en la glisch dals reflecturs. **Chiara Jacomet** e **Momo Kawazoe** creeschan musica che sveglia emoziuns ed animescha da sautar viaden en la notg. Concluder la saira san ins alura cun drinks e discussiuns a la **bar nocturna**.

Era la sonda saira è deditgada a la notg. La moderatura **Tonia Maria Zindel** preschenta per l'emprima giada en sia carriera **istorgettas da bunanotg per creschids**: Tschun autur:as romontsch:as dattan en lur istorgiettas invista en tut quai che la notg sveglia en nus e creeschan cun lur texts in spazi per tematicas che vegnan savens stgatschadas ord il cler dal di. **Asa S. Hendry**, **Barla Coluccello**, **Benedetto Vigne**, **Göri Klainguti** e **Jürg Gautschi** sa fatschentan cun la notg e cun tut las bramas, basegns, patratgs, precipizis, dubis e desideris ch'ella porta.

En in mund nua ch'ils cunfins tranter siemi e realitad sa dissolvan maina la **séance da mesanotg** da **Gion Mathias Cavelty** ensemen cun il mentalist **Christoph Borer**. Els envidan ad ina show da magia plain horror e humor e preschentan sco punct culminant la materialisaziun dal emprem carstgaun rumantsch.

Ina rolla centrala gioga suenter dus onns era puspè la concorrenza litterara **Premi Term Bel**, sponsorada da la Vischnanca burgaisa Domat. La sonda suentermezdi prelegian las finalistas ed il finalist lur texts e la giuria discutescha publicamain ils texts nominads. En concorrenza èn «**A chatscha**» da **Sidonia Pazeller**, «**BE CALM**» da **Flurina Badel**, «**Morsas da mustgins**» da **Viola Cadruvi**, «**Sbrai da suldüm**» da **Janic Maskos** e «**Vent**» da **Natalia Salzgeber**. Part da la giuria sur place fan **Fabiola Carigiet**, **Giuanna Caviezel** e **Rico Valär**. La victura ni il victur dal Premi Term Bel vegn annunzà:da la dumengia suentermezdi sco punct final dals Dis da litteratura.

En la nova runda litterara **sfegliar e discutir** discurran **Bettina Vital, Claudia Knapp** e **Viola Cadruvi** davart il roman «Amur, grosser Fluss» da Leta Semadeni ed il comic «Pippin il patgific» da Tim Krohn. Adattada per affons è **l'istorgia illustrada** «La Nuala –La dila da las nùvlas» da l'autura **Selina Cadonau** cun illustraziuns da **Mattea Gianotti**. A giuvenils (e creschids) sa drizza il **crimi** «La melodia da la già» scrit da **Valentina Parolini** ed illustrà dad **Aurelio Todisco**.

En ses emprim cudesch «Furt e naven!» scrit en ina en ina lingua frestga e directa ans maina l'autura **Carin Caduff** sin viadis en divers lieus e temps: tras il vitg, en sortida, tras memorias, en l'uffanza.

Tut ils/las amis:as ed amant:as da la poesia spetga sonda sera la **vernissascha** da «Aruè», la nova ediziun da éditions d'en bas: Ina racolta selectiva deditgada a la poesia da l'Engiadina Bassa e da la Val Müstair en rumantsch e franzos cun **Denise Mützenber, Gianna Olinda Cadonau, Rut Plouda** e **Tina Planta-Vital**. Era la **Litteratura 41** sa deditgescha quest onn a la poesia: Tge è quai? Nua inscuntr jau la poesia? Cura ma surventscha la poesia? Sur da quai discurra la redactura **Flavia Hobi** cun l'autura **Gianna Olinda Cadonau** e l'autur **Arnold Spescha**.

Dumengia avantmezdi han lieu gist duas vernissaschas: La 140avla ediziun da la **Chasa Paterna** presenta texts curts che raquintan ina regurdientscha da l'uffanza per mintga vischnaunca putera prelegi da **Gianna Duschletta, Riet Ganzoni** e **Jost Falett** cun musica da **Curdin Nicolay**.

Lasuenter presenta **Leo Condrau** cun ses cudesch da fotografias «ir – per turnar» in viadi en il lontan. Nus ans imaginain las istorgias da las cuntradas ed dals carstgauns ch'el ha fotografà e persequitain il medem mument sia biografia.

Era sin in viadi fotografic, dentant pli manaivel, maina nus «Spiert engiadinais» da l'autura **Fadrina Hofmann** ed il fotograf **Mayk Wendt**. In cudesch che documentescha las atgnadads engiadinaisas e tschertga fastizs da l'identitad locala.

La vita extraordinaria d'ina Engiadinaisa ord il tschientaner passà preschenta **Rico Valär** cun il cudesch «Traunter di e not». **Clementina Gilly** (1858–1942) è stada ina pioniera en plirs regards: sco publicatura d'in agen cudesch da poesias e promotura dal rumantsch e da las dunnas.

Remartgablà è era l'autobiografia dal Sursilvan **Gion Casper Collenberg** (1733–1792) che **Michele Luigi Badilatti** ha perscrutà en sia **dissertaziun** e preschenta uss als Dis da litteratura. Ella raquinta da ses viadi sur mar da la Frantscha sin l'insla Mauritius ils onns 1765/66 – in'expediziun privlusa en in mund nunenconuscent.

Era enavos en il temp mira l'emprima **antologia surmirana** «Da se cò». **Linard Candreia** ha rimnà 73 texts da passa 50 autur:as ord in decurs da passa 150 onns che dattan ina profunda invista en la lingua, cultura ed identitad surmirana.

Atras ils dis e quest onn spezialmain las notgs da litteratura maina la moderatura **Anna Serarda Campell**.

Il program detaglià dals Dis da litteratura 2022 chattais en l'annexa u era sin nossa pagina [www.disdalitteratura.ch](http://www.disdalitteratura.ch).

Cun cordials salids

Per il comité dals Dis da litteratura

Laura Pfister

[pfister@disdalitteratura.ch](mailto:pfister@disdalitteratura.ch)

+41 79 174 95 57